

復
莊
詩
問

復莊詩問卷二十二

大海集

鍾海姚

變某伯甫

鍾海姚

八月二日遣僕之鎮迎母及妹與兩兒移居郡寓
暫避海警得三章

罔測天事深甘嘲人計左順軌得坦途誰竟免無禍孤
城屯萬軍七月暑猶瘴徹旦刁斗鳴雲光壓繁火暗影
弓作蛇喧呼動疑叵比室鍵密門正襟肅宵坐吾家三
椽屋危牆偃霜笥譬如奔濤中浮之一葉舸安知髮繫
鈞不遭斷時墮郡縣雖齒屑地深避聊妥薄絮詎云暄
勝於解衣裸庶免亂石叢時時履硤礫

顛倒錯籠篋瑣具零星裝寒衣束成捆破書歸一囊長
物已不多棄之應未當喜我白髮親精力猶健強在路
恐有遺一一身檢將蕭然孤客樓櫺葉交頽黃遂使西
風中四溢春暉光弱妹頭裹巾手抱鍼線箱大兒僕運
物堆置西隅牀小兒啼苦飢索餅牽我裳有觸淒我心
強笑未敢傷且呼竈下嫗覓火炊宿糧

朋輩咸過從絡繹餽雞酒顧此荒厨中豐腴頓矜有稱
觥語和樂晨氣煦東牖天空萬象澈融融座衿受家食
娛太平托天素深厚樹巢偶警風何當預防後寘夢沈
綠蒿但苦地下婦猶勝離亂亡未獲正卧首多力奉

公作息劬奔走敝室如冷菴日遣弟孤守

家君之鄉勇

坤亦隨侍頻傳慰藉書謂終泐羣醜相期挈眷還重縛

守宅未來掃苔帚

欲睡復起成二絕句

窗紙偶然落葉鳴夜光如水逼空清一雞來語槿籬月
不識愁人方撻檠

宿火銅鑪有燼香獨闌樹杪倚茫茫四城巷柝露聲澀
敲暗東牆牘月光

讀漢書五章

天地絕外內人獸乃殊生羈縻誤要約隱毒遂相萌我

復莊詩問

卷二十二

大梅山館集

繹楊雄書慨焉爲涕零太虛多清風詎容揚臆腥恢哉
萬年策帝相方承平便廢鹽鐵官猶足餘織耕玉門列
亭障白日高崢嶸揮手驅貳師面可樓蘭黥驃騎能早
來婦稚皆足兵莫怨建元郎謂其通道輕

區區鄧光流罪奴不足齒好言洩國謀於例亦當死有
舌攻長城安庸砮人痔奈何廉恥亡覩然號君子季布
無悔言豈真金可市頗嫌蕭鄼侯失機在更始精意逝
九閔平鴻頌函祉臣佗隸陛下胡敢側目視遼東不善
封宰羊笑於豕奈何矯所謀聲名妒專美

堂皇建義旗長官氣先折遂使瓠子河塞每後沙汰亞

夫真將才懸膽棘門熱凜也監子流曾不費朝長情哉
以蟻汚早違孝王悅雖有沙匪功長蛇苦中齧材力選
羽林六郡動騷屑誰憐上郡寒層冰有淹轍斷手無辣
刀兔狡遂多穴吾愁渤海流蕩爲漂杵血

避謗圖苟安詎云知體要竭爾灌嬰謀難弭過山盜天
門雲九重守之赤文豹蒯生雖善言無由瀝血告金錢
費流輸廬山壑如窖六軍霸上來盡爲兒戲譟應變在
慎權監遠不資耄張掖惟弱兵犁汙尙難傲孝武天亶
才詔令見能到是以元封初師讐朔方暴

兇忍恣屠虐單于自鯨吞未聞呼韓邪背我天子恩
復莊詩問

沙七千里守險資麻渾豈徒塞白龍用以懾烏孫六經
治天下道在先幾存詘強而得和猶愼心討論輕謀投
之隙衛霍亦喪元衝突蕩姐場當思抵吾藩楮汗大宛
馬翠羽珠厓鵠奇貨雖足居咄嗟吾難言

寂夜二章

士也何能百讓人塊然土木詘微身漫從寂夜搜佳日
屢向荒歧覓要津滄海舊桑猶自畝小山叢桂已將薪
君平去後無靈卜且挾疑謀問鬼神

誰嗟行止櫛株拘音也噉噉口未瘖消我年華三寸管
看人意氣八觚爰釣魚聊可師龍伯寧肉真難食狗屠

叅得蒙莊齊物論和董巖矣扇黃虞

南郊散步

氣涼蛙水闊雲重雁天深不斷遙村樹都遮抱郭岑客
多秋葉思農有晚禾心近夜商風急吾衣薄未任

燈下按錄蘇編修

延魁

詩集卽寄懷都中

儒者之言俠者風壯吾夜氣劒生虹木天緝雅誰同座
大呂調琴是正宗可憶荒山羈病馬近聞高峽亦流鴻
千家夢尾驚狂嘯獨閣孤燈萬角巾

當遠戍辭

炯炯明河斗正高茫茫闊海雁初翔生涯乍可供團飲

復莊詩問

卷二十二

四

大海山館集

憂患誰能仗實力古思在胸聊媚留淒霜入夜已盈旄
思歸未卜瓜期代甲帳貔貅夢亦勞

孤立

一振金天氣恩迴肅殺中萬心秋與淚孤立慮誰同暗
谷聞暄日窮漠見暮虹好搏鵬翮健青界擊罡風

聞定海城陷五章

轉戰六晝夜飛檣索援兵重海豈真遠孤軍亦已勦難
言無善策誰實壞長城大帥方屯浹恬然樹羽旌

蜃雨濡軍幘獐麇拉將旗飲泥憐久餓摩壁誓同危路
絕晨嘶馬雲昏夕墮鴟銜恩持死力力盡死句辭

不滅豺狼種 恩真宥爾多
敢矜釜底活重覺心中波
德固威何損貪深計亦訖
愁聞淩雨夜枕刃唱蒿歌
莫救城門火池魚枉恃存
有端開憤隙無術懣驕魂
肯氣連山白焦流入隘渾
亂尸如敗葉漂過吉祥門
覆有前車鑒民逋地一空
守難羣力借棄與敝襦同
鬼恣跳梁瞰天愁撒手窮
羣公膺上爵何以問孤衷

送婁皋還通州二章

可憐垂塌翼不作健鷹飛
艱苦三吳客飄搖一舸歸
從戎心未老草檄願都違
積悃抒何自臨行涕與揮

滄州一夕陷兵氣慘難舒
王粲無侯骨陶潛有遜廬
寶

刀憐未試圍菜尙堪鉏莫使嚴城客頻頻盼雁書

聞夷兵將攻鎮海舍弟坤自家來郡寓

空烟呼萬鴉單舸渡桃花

渡名

無恙邀天福陳餐便夕加

危牀擁孤燭靜思逼繁笳攸閣更東望亂山橫暗沙

時家

君尙在

鎮城

速速去去五解八月二十六日郡城紀事作

是日午間

夷兵陷鎮海城家君傍晚始抵寓
喜無恙因述聞見作此詩記之

繡旗大布帳四角碇鐵城頭莎東帳老兵擊柝西帳健
卒起而鳴鑼鳴鑼擊柝呼呼呵呵觀面錯愕交耳速速
去去倏忽輕趨巡走如擲梭手指東南雲雲頭山脚相

摩搓雲中赤火閃閃霍霍似有鏃聲書嘯千百砮下顧
江水宛延一綫無風翻波過江亂鳥場翼結陣西向噉
噉覓林柯噉噉飛飛速速去去棲止不得林柯前有抽
矢而睨者後有尉羅城頭軍士若防若避各各偃旗卷
帳帶甲手橫長戈 我趨東門城見守門卒吏短衣帶
刀排立城下聞西街喝道掠地鳴鞭聲隆隆長跪向爛
地不知沒泥到踝頓首拱手屏息迎接官者官者不知
誰何藍頂貂翎紅纓長髯如戟面塗赭左手持令箭右
手結轡鞍轡匆促下馬口作喋喋辭以韉蹶瓦其氣洶
洶似不可惹但見府尹知縣肩輿張蓋東牽西撐下及

佐吏千把一一出城入城流汗沐面握衣相跑跣速速
去去築堦築堦呼兵不磨涎枯喉啞關城門關城門
城門不得關百姓倉皇擁擠速速去去相探視手足鉤
棘肩推扳須臾敗而逸者沿江過渡入城絡繹其勢如
崩山臂帶頸欄衣襦不完面焦身漆行步蹣跚誰辨其
爲兵與官亦有雇夫舁籠扶板蒙被過頂瀝血聲嘶酸
可憐翁嫗婦女幼稚翹足延頸當路叫謹望爺覓子尋
夫呼哥索弟悲淚交沆瀾不願無火傷刀箭瘢但願不
受戰歿全尸還咄咄嗟嗟大難大難官長不得彈壓守
城兵卒各各搖首顧視灰其顏使我一寸心亦作千刀

剗 急趨急趨向東渡頭水急分東西流岸篙打槽揚
揚意氣一人索百錢四五十人同一舟踉蹌後至捱擠
不得渡捱擠落水落水復上水自恨不如鳬鷗且止止
休休仰看天色蒼黃日墮城背俯聽彫楊亂荻其聲颼
颼奈何有官來官何來官來尋渡有卒壯健十五五
環擁一騶不衫不履恐人相識拚面低頭但言速速去
去去去速速不知往何所投且止止休休踉蹌後至望
渡而泣皆爾兵民已一日不得糧與餒 僕來覓我渡
頭牽我衣向我耳語急牽僕衣隨勢擁人入城速速去
去東巷市早停西街運貨關鋪短衣執挺守門當路遺

烏墮帽滿街倒柵橫
日暮天昏昏狂飈過耳聲摧城
樹似有萬千百人哭聲與鬼號
諄入門見我老親老親方解襪
易屨弟妹扶母出堂環坐慰問
其樂莫可言喻
斫木作柴炊釜梁餘柴烹栗芋
斯時東鄰西鄰雞亦不聞鳴狗
亦不聞响但聞張燈張皇催老
促幼呼速速去
去使我家人停餐廢箸笑不得
笑悲不得悲行不得行
住不得住孤燈破樓坐難曙四
壁搖搖愕相顧

驚風行五章

二十七日郡中傾城避難余一家徒步出望京門假海會寺僧舍暫宿感

懷紀事而作此詩

弱草靡驚風誰能顧根蒂漂我同室魂往將匿何地生

死憑虎狼恣焉凜天憐入口艱半飽夙命已乖盪薄睇
爭曉陰路草炫霜翳便投土窖深胡敢望安憩偕行窮
巷間蒙羞苦無薜踉蹌千百羣十面九垂涕相識亦有
人低首但遙避可憐窮竭心各因保身敝勢難窺冰淵
閒暇論高義觸礫愁趼焦顛倒互牽曳假廡聊息勞已
勝百椽惠

經新巷少憩袁氏將近西城人
多不得出遂復偕家人止沈家眼看深閨居

平等愛狼戾流汗知腹枵姑爲箝口閉大陸交頽波迷

津逝焉濟

微命不如蟻蹂躪多苦傷乘危掠衣物剽悍胡能當咄
嗟眢篋流白日行堂皇旣無官令嚴誰恃身勢強萬人

復莊詩問

卷二十二

八 大梅山館集

趨一門黑暗如排牆潰地一闕聲上辟鴟鵂翔進退居
兩難翹企偕徬徨訛傳咫尺間已斷濠河梁失色盡灰
土何有肝與腸共乞皇天仁願緩時日亡白晷誰家女
剗面無完褶繡襪汙爛泥認是官家郎還顧我親屬欲
止路無旁雖喜平安存呼吸誰預防凜冽未入冬草木
先凋僵野燒發窮蟄在坏何閉藏

將吏無守心眷屬夜先遁餒氣由上萌何從禁民亂舉
郡爲一空白晝絕烟爨棄飯荒城根餓狗逐雞竄巡城
雖有兵逸者已過半意謂軍律疎當無誅罰患仰看日
薄西行人稍得間遂脫虎口危未嫌牛後殿出郭陽野

垞愁鴻豈徒萬爭坐不擇地轉似獲安尊甚至叢塚旁
投隙設蒲薦頗聞糧餉移官食不保晏况爾蚩蚩氓本
來草苴賤在目洵可悲自顧益危憚於勢難再窮何由
得權變且從西市廬坐愁片時倦

兵燹有恒刼理難蒼昊嗔未竟殺戮遭已叨無盡恩暫
謀一夕安遍叩識者門誰防捷足多實無餘地存豈當
投露草宿與飢鬼鄰疾日不慰懷漸漸西雲昏望途森
亂棘視水惟流湍在昔安宅居凍餓尙匪艱棲鳥彫有
林匿獸荒有山但得托止常亦聽毛羽殘勉趨禪室謀
爲我讓西軒轉覺兩間窄獨此廣厦寬難僧走供燭菜

芋紛堆槃奪命溝壑餘何暇飲與餐幸保骨肉完彌使
心淒酸隔屋多慘啼愁陰夜方漫

患難遭倥偬顧首不及尾老客同廬居獨父依一子薄
宦羈浙東鄉途曠千里命獲意外全安復顧行李頗聞
乘虛來引逆多內宄焉知此屋梁明日不遭燬瘦燈淒
影交密籌致親昵搔首方踟躕金甌過天輒似有逃鼠
羣遷穴出西境潛行循殿廊佛火炮煙采露宿同積尸
生機已頽靡寺殿及兩廡逃民無所歸者棲止幾滿視之不下數百人不復男女分
枕藉馬牛矢縱免刀兵傷已卹陳餒死豈真無衛生斯
民有廉恥恐爾來朝蹤不如今得止滄海方橫流烏從

測涯涘

二十八日夷逆以火輪船窺探三港口

敢肆鮮卑膽來從內地窺斤將傷到鼻燃已急當眉雲
壓三江動烏啼萬井危要津猶可據吾憶李鴟兒

哀東津

甬江夙稱財貨藪出納金錢日千斗市估意氣同驕雲
能叱碑鼉過河走結羣斂利逾國征上賄貪官作心
手熾熾虐火揚燄爐慘慘盲風扇冰阜樹巢欲折鴟何
依失色奔踉蹌如狗窖銀不救一餐餓掘穴牆根作行
牖弱民側目心幸災強者乘機起爭踏當年抗禮大府

復莊詩問

卷二十二

十 大梅山館集

庭袒裸蹲街席遮醜小人弗自量威福宜以淫凶啟天
咎如磐黑青津南郡亦有虹芒射蒲柳敗兵洩憤來捉
人險地株連到黃口拯危應變雖有才難拚將軍甲額
厚大儼四目遭鬼欺去向窮村嚇癡婦健兒赤臂刀懸
肘縛罕橋梁馘三首縣官率隸來助威石響銀鎗綆拖
杻飢鯨飲血揚赤鬚塞岸昏霾掃一帚還虞滋蔓及善
民星夜譏行密巡擷辟人昔熊真雄赴立爾消亡向烏
有祇神驅魅乘豹過銛刃抽霜刮塵垢車傳捆運空積
藏黠鼠徒勞坐關守烹菰搗蟹供樽酒風雨無驚護船

叟

北村婦

妾夫充水兵戰死浹江口願妾懷中胎生男續夫後昨夜生一男夫死妾有子生男未一日獐獍遍鄰里云賊來虜村跣足偕逃奔妾死尋夫魂殺妾賊之恩妾殺不足惜妾死兒何存摺衾手襁兒河上行遲迴一步一顛撲蓬髮面如灰妾欲還孃家孃家路懸懸指拈雙銀鐲手招河孺船刁民來奪衾並奪妾兒去眼看將妾兒投棄亂流渡

杭州商

身爲杭州商家住五鄉堡昨日聞亂歸行裝亦草草積

錢三十緡薦拙藉以藁庶於擾蕩時暫供粃糠飽青巾
亡命兒瞥足等番獠客亦周防嚴弱難抵奸慄坐視席
卷空還遭槌傷腦鬼火吹荒蘆天地夜陰宵握面聞血
腥魂危氣垂槁兒女六七人母年七十老便能匍伏還
性命亦難保積骨同一邱或勝各成殍苦渴但思醪望
白不知阜可憐蓬室居夢猶太平禱更期資有餘買棉
具衣襖

山陰兵

霽霽江雨淒江灣少人過亭柱多漏痕一兵藉草臥覆
額聞微呻呼痛不呼餓面目經火焦血肉土攪洗自言

垂盡心碎作萬米簾憶昨臨戰時棄馬將先慙同隊兵
五人三者遽殘剉其一憐我傷力疾冒烟馱頃猶依我
旁煮藥守磚銼生逃罪當殺恐遭黜者邏遣其歸報家
且免死同坐但得尸還鄉速亡轉堪賀偃地枯木巢慘
有病鴟和如聽招魂詞哀作楚音些

冒雨行

自郡西至
慈谿作

晨起就僧竈宿飯澆藜羹簪躡芒屨冒雨官塘行官
塘接西壩鱗比千船停一船一家屬男婦錯盡嬰顏色
困焦悴兼以愁苦聲非不戀家室家棄身轉甯水昏入
烟爨柳禿搖枯藤蒼氣翻遠空睥目多餓鷹儲糧苦未

足還復虞奪爭既無土可依性命隨蕩傾萬里豈真闊
天地交淒冥頗悔游惰安負昔時太平我行倦我足望
亦傷我情沿江斥堠虛冷濕膠旂旌敢恃隘道紆節費
聊撤兵東川昨震動大帥催移營已逃挫折危誰肯誓
死撓更聞和議書密結城下盟焉有閒暇謀遠及井底
涇逡巡赴沙甸鹵下潮冒砮高岸漁臺翁坐對荒山青
迴颺咽蘆荻急漲漂種杭自顧短濕衣透骨寒已兢過
渡踰橫山遠見慈湖城慈湖據右鈴背扼姚江營藩東
郡猶固勢勿愁鈴舛胡爲密葉巢影散黃雀翎人馬互
蹂躪爛土無完善死卒堆驛堂流血苔根蘋可憐瘦隸

孤寮守敲銅鉦入城覓朋舊
匣巷鍵柴荆叩之不得開

並絕雞犬聲中路遇軍走

去

面作倉皇形似有密報投

低首趨縣庭維時晚色交暗
欲嵐霧凝通市千百樓十

樓九無燈助我摧惻懷雨急
風益勑坦徑疑棘叢斂力

難再勝故人有馮豹

謂馮五橋
同年雲濠

高義孫宰矜未吐覲面

詞先爲握手驚謂遲一日來
吾亦他鄉征匆匆辦肴酒

解衣煖我膺解錢充我囊慰
我毋怍怍窻梧響寒滴騷

屑攪蛩鳴仰見銀河瀾濯出
三五星漫愁今宵長祗願

明早晴推與詎所希道誼關
平生迴思僧院中親孥方

擁檠當嫌哀笳繁靜與啼鵲
并咫尺滄溟遙塌翼慚鴟

鵬假寐且息勞蟲飛遲夢夢心緒糾亂絲櫛理烏由清
遣王僕至中橫河覓避亂處

弱蓬在中路豈竟任漂搖眷屬有同命江湖餘一瓢食
窮思橡栗志短逐鷦鷯但得山林密簑簑我願樵

獨行過夾田橋遇郡中逃兵自橫山來

急情逼我行冒礫忘癢胝明知大事去猶作平安期決
皆望東雲垂天曠無依下凝深黯光不見一鳥飛頗傳
哀澤鴻多受羅網轡相勢或遠颺蒼莽究何歸忠襄謂靖
有名裔赤角森神騅夙昔百戰身能振天山墮胡竟懦
氣乘坐視萬屋灰聞率麾下軍縱轡先遠馳宜使敵勢

閒不擣遂登陴斯時百里中何地堪立錐但聽愁哭聲
隱隱風頭吹繞渡多逸兵弓刀棄如遺倉卒不擇路未
識行何之消息畏探問子影顧可悲性命苟盡存復何
惜流離平川靜漂葉海氣蒙午暉喚渡吾獨東往蹴虎
口危

西成橋遇舍弟

時家君於辰刻已攜眷買船偕妹

所親弟及舉兒前一夜猶同張僕在
城中寓宅宿故遲未同行俟余還那

所見已如斯爾行還曷爲但言各無恙勸我不須悲脫
阱事真險聞安心轉疲且從齋院息啗粥解吾飢

閩臯兒在城中阻夷軍不得出同弟向長春門冒

刃入城至寓館覓得之薄暮始乘間出城

窮奔百里餘撫足懦垂敗自非甚所危斷難鼓之再嗟
爾織鳥愚戀嬉不識鍛利斧摧亂榛鳥從索其在縛肝
懷餅糧循阡蹴蕪菜荒濠多陷沙紆路斷津礙日慘墟
不青地已等荒外手扶予季肩略振氣頽憊鐵砦當嚴
關險於隴西塞哀角嘶餓鴟捎雲颯蛇檣紅衣九地魑
蒙首虎皮纒鋼刃三稜銛密布數重械漆膚跳裸熊懸
竿鼓旁搥縛人搜帽裳睽睽目光晦白晝吹赤燐射影
作妖孛抱堞張網且欲乘竟無懈居然拚虎鬚奪入井
陘隘紆迴中道間離蜂復遭蠱眼看過巷人咫尺受殘

害抵館急啟門完身幸辭累見猶恐匪真反覆視衣袂
吾館宅至深週牆百屋衛差免劫擄遭既安復何憊吾
力持已微吾身飢且瘁急殺時中食更煮宿藏糲禍福
甯可憑且圖一餐喂登樓望塔陰愁山昵影黛城角多
棄尸踰鷹下成隊昔日車馬門氣象雜荒穢誰憐歌管
聲隱有悲哭代雄軍統萬夫詎難致敵愾胡爲鐵甕堅
竟教彈指潰苦縛兒女情難伸丈夫慨叔日已就西遲
行恐不逮寒裳趨自南溷跡逐駟僧砥途猶皇皇冰霜
履生戒喜於飄風中還我病蟬蛻迴視泥犁深石火怒
方殭在吸未及呼頓分人鬼界雖云拂手空聊作振衿

快刺目干林枯蕭蕭動淒瀟前趨投佛寮天許險艱貧
相將高枕眠不愁夢境壞

遲張僕二日始出城云爲夷縛去供殺幾不得道
紀其所述成二詩

匿泣堂隅看鞠囚提壺厠坐戴冠猴謂如漠泮漂心遠
幾使艱危與命仇裂帛紉花腰束素張囊索餅面塗糝
陰蘿羃野無暄景淒絕沈魂向九幽

倒垂銀蝶飾豐顙唉嚟當門喚酪酥烟纖妍華藏雒雒
風搜治葉媚雄狐寒芒動劍星絲緊捷笑迴燈背血枯
僥倖銜枚單騎走出關巧借魏王符

海會寺別雪公買舟同舍弟舉兒自十字港抵沙
港唐堰喚渡過蘭江道中得五章

荒田灑微雨曠路無行人十千買一舟窄僅容兩身席
蒲作箕踞病膝苦未馴漫海羊角風瀕洞奔愁雲遠嵐
拒雲氣匿翠生凍皴萬籟同瘖箝倏向重淵堙老僧趨
送我致意當河濬謂遭原火燎勢已及比鄰亦將投空
山餐柏侶瘦猿恐君他日來但拾灰餘塵天地有後逢
相期同保珍放棹隨去流汎濫終何垠

官河苦多盜紆港還苦遲冷色來晚人已芙蓉枝夫
蓉花淺紅牘綠攬柳絲野人立柳旁手把長項犁似傲

田居閒含笑目相移故撫牛背平扶童與之騎讀書無
一能我實心慚伊平生志胞與民命關瘡痍胡祗同室
人尙難免流離去當事鉏種矢與槃澗期

河長不能短心短無能長將辭語弟子未語先惻傷爾
等在平居飽煖適其常寒素棉衣溫飢就炊釜香世境
有凍餓此苦曾未嘗習惰不務勤溝壑誰應當我爲爾
兄父敢怨身夷創萬一轉捩窮孰保中路僵矧有頭白
親未出戶與堂忍使荆棘中風雨偕踉蹌老年有深慮
意豈安異鄉去當順所歡慰使愁苦忘東流下冉冉西
流交湯湯爾等同在途須知親久望

驕風漸催夕各苦衣裳單過天千鳥飛盡向西南山計
里問舟子低首愁瀾漫鼓枳腹久枵筋力疲與殘脫錢
叩村店市餅慰其餐遠烟出篝火木末沈遙巒深涼切
膚體噤齒忍已難腋窄遮無篷肩背同簇攢好爭逆水
流爲我兼程殫夾淑蘆葉叢源歌自閒閒豈其江湖中
亭止無愁瀾

二更抵唐堰渡北無一舟隔江星光低隱照江干樓柳
縫趨暗潮似聞漿聲幽閃動白點微因知過者鷗遲回
正無計瞥見燈影流久喚遙不聞怨彼風響仇行藏有
絕境達人難預謀天闊夜方長水逝心安畱我生遭險
復壯詩問

阨窮超無不搜萬象黯霽中三人眇相儔欲止不得宿
欲行安所投幸遇披簑翁涉我楓林陬

抵江村羅氏山莊

叩門尋我親心喜各無恙轉忘飢與勞一振衰氣王出
始酬主人邀我入軒梘頃慚禮貌疎罪須鄙情諒沙氛
低壓空秋響澀難盪亂葉走屋楞羣鳥斂毛抗大陸兕
虎愁元陰塞芒碭燒銓萑蒿叢免冠泣諸將何有閒暇
心籌及萬軍續我行得所依未敢復惆愴坐撫初菊紅
放懷飽村釀頗如枯槁枝獨承春煦盎餓鳶投窮林孤
猿入深嶂庶乎定後魂永辭危海浪

貧百梁橋南楊氏屋移家寓居雜述十三章

一椽猶得庇未敢怨蕭條鳥共投林密山先向客邀支
牀分枕蓐乞米試鐺瓢便不嗟瘖口余心亦已焦
漏壁待牽蘿深門好踏莎放愁資野闊遣寂仗鄰多選
草看編席梳櫬效織梭安居無外警永矢碩人邁
昨夢城南巷吾廬樹不青月涼苔自閱蛩斷夜誰聽音
問探親友存亡半窈冥遙看孤雁外愁霧塞重溟
江緊千巖束居窮萬事違風雲新態變蹤跡故人稀
靜思書卷宵寒憶質衣晚禾看遍穫差共免年饑

逼人來至此定數亦難論已覺謀都拙空誇舌尙存身

愁腐草木業未慣雞豚我媿東籬叟名淹道自尊

頗聞亡命輩擄掠遍諸鄉托跡還僥倖相依得善良誅
茅時足饒饋辛日盈筐縱匪南山豹聊爲暗霧藏

漸傳諸舊好多赴近村居短臂愁揮劍深情待執袪驚
弓吾倦鳥脫網爾枯魚一樣漂蓬感關心故里墟

食糧愁不繼卜筮待如何歧路文章賤沿江寇盜多往
堪資告語涉未畏風波搔首憑蒼莽冰天削面峨

客有攜樵斧行吟過澗來入山乘未夕顧我若相猜相
老深紅墮烟荒暗翠埋何當借君手趁勢刈蒿萊

落葉誠何免清閒轉自難低眉從牧飲晞髮岸吾冠未

竟乘桴險終愁立地單感伊千葉篠護我夢平安
睡醒聞亂葉猶道是哀笳起拓西窗坐思持北斗斜漁
臺明獨火巡柝警羣鴉衆象歸元寂徒憑望眼賒
無巢堪借宿憐爾過天鴻世境多難問吾身未甚窮得
邀天相厚且拓酒懷空舉我芙蓉袂招他薜荔風
親孥同聚室隨地可羈畱未改完天樂何須越分求臬
糠聊度日蕭颯漫悲秋好俟經氛靖重爲返族謀

復莊詩問卷二十三

大梅山館集

鎮海姚 變某伯甫

曉起

揭幕高風竦倦吟
厲吾秋思不須琴
最憐病鳥依涼日
始識空山有住心
大象入荒歸簡率
壯懷投寂易消沈
東南昨夜猶淒雨
鬱樹蒼雲接海陰

自沙港口至櫟社作

野翁攜筇指路草
馬蹄跡多人跡少
過江禾色涼荒荒
不與愁顏潤枯槁
上江炊氣如白雲
下江碧山猶雨痕
瘦鷺荒磯貼漁艇
亂鴉古木當柴門
我行芒屨一雙滑

負囊逶迤來前村村橋側入千篁昏芙蓉未醒秋霜魂
芙蓉花陰破樓獨三兩兒童曉方讀似於十萬哀猿中
來聽纖鶯憂寒玉海東千里烟塵黃此地深沈太古綠
我行且行安所之西風過笠疎髮吹人間隨在有通徑
奈何四顧皆窮歧明朝食息不可知托身益孤情益悲
河流袞袞斷蘋葉遠笳惻惻高城暉全家寄旅少儲粟
獨客出門猶薄衣蹇驢莫貰足已疲荒亭坐息良自宜
荒亭柳枝青霏霏向我袖角來飄垂眼中一流離客
都道空城無雀飛

城上烏

城上烏尾畢逋將彈爾肉腊爾膚爾不遠飛胡爲乎城
上烏聲鳴哀昔年城上有大樹今日城上無蒿萊城上
但有白骨堆爾不遠飛將胡爲天海秋寒月蒼莽西風
到地一千丈羽如敗葉颯已彫心懸空闊魂難逃鬼車
旁曉流涎臊七星閃閃芒如刀

段塘火

首讞乘亂機論罪當寸磔豈至讞有疑連辜坐清白官
法罔濟天理窮昭昭自有人心公殺人不死還自殺惡
獬食虎鷹搏鵠段塘所養多椎埋其風鷙忍同八排朝
聞軍陷暮出掠袒胸裹髮塗面煤呼螺擗鼓相援黨柴

炬牛刀作兵仗飛雞升屋豬入牀地色不綠天蒼黃金
銀掘窖糧搜倉敲撲甕缶傾籠箱鞭男撻女哭聲洶四
鄰關門不敢動六營解體丞尹逃誰來捕爾誅爾曹姜
山義民奮臂起三五百人誓同死來如行雲去如水鼠
有巢窟梟有雛赤梟一掃黃頭趨樓灰屋燼魂魄誅爛
焦不顧池中魚我行蕩舟過其里烟輪磬磬太陽紫敗
樹摧颺塞河觜羣歡相闕手相抵天道循環有如此

入郡城之寓廬守寓者已絕糧三日

破書無鬻地貸糴亦無鄰死且慰誰托吾嗟累汝身釜
空窺鼠粒案有蹴烏塵且拔圍隅蕨抽籬代火薪

太守門

鬼官設座太守門愚民號泣來訴冤細書事狀長跪陳
鬼官不解民所語旁有青衣相爾汝小事雞一匹大事
犢一頭我當釋爾苦官當如爾求爾不雞禡爾衣爾不
犢剝爾肉縛雞牽犢來獻公驅犢入柵雞入籠鬼官點
頭畫破紙畫篆如符闊三指歸貼門戶堪辟災有不得
者心悲哀明朝當辦肥犢來君不見墨書朱印 天朝
字門上猶懸太守示

兵巡街

猾豎攜鞭作前導羣厮肩錢逐後笑鐵矛三稜金鞦韆

鬼兵率隊來巡街東街穿市門西街入民戶穿門爲狼
入爲虎索錢一千充酒資爾家有妻保爾妻爾家有兒
保爾兒爾無妻與兒爾身隨我敵擲執火使爾朝朝飽
餅麪爾不隨我還無錢爾不見鄰兒背受三百鞭血肉
狼藉城根眠

官家兒

爾爲官家兒而何破絮無完衣膚焦骨聳同餓雞當時
見爾城南嬉桃花貼肩纖鷗飛妙童挾彈行相隨七尺
青髯驪爾今胡不騎爾來道旁踟躕知何爲爾父不來
作官守道旁黃金非爾有爾父無恙今猶存胡爲爾止

無屋歸無門使爾飄作他鄉魂

棄妾行

大樹一夕崩栖鳥四城窺眼中露草飛野燐猶道明星
畫樓爛畫樓深深妾所栖花靜不聞鳥夜啼但聞管聲
忽高絃忽低東風搖燭生紅漪絃繁管急樂莫樂哀笳
一聲吹夢落夢醒不見桃花紅主人沒入千軍中主人
不知西妾行安知東主人不爲風妾去安爲鴻頭上金
釵兩頭斷主人命薄妾命短

毀廟神

神不殺鬼鬼殺神陰陽顛倒夢屈伸明州城中二百廟

宰木森沈亂鴟叫昔年廟神有威福大祭平筵享魚肉
今朝廟神遭鬼欺鬼攫神帽穿神衣小鬼手擎神案旂
倒執神笏相娛嬉折神手作薪炭支神頭炊麥飯炊麥
飯煮麥粥弱鬼瘵死強鬼疫神廟朝朝聞鬼哭

瘦馬引

城中無一馬一馬在城下骨瘦毛卷

平

沫流赭力茶無

爲意亦捨我聞韓王御馬如御龍其馬肉角青方瞳橫
槊斫陣飛如熊入陣馬白出陣紅人血浴尻難汰洗箭
痕入骨縣復起西風一夜八百里但見奔雲過關紫近
聞此馬沒陣死特續馬圖進 天子 天子下淚圍人

愁淒霜颯颯蓬蒿秋眼中之馬長廢棄拄足城根齧枯
地當年玉勒黃金鞍噴薄天精軼房駟未料人間有危
事吁嗟乎爾羣三十遭鬼屠爾馬雖瘦能完軀昔爾騎
者今何如爾不見將軍脫甲南剡趨涉山無馬乘竹輿

捉夫謠

江頭白鴉拍烟起飛飛呀呀入城裏城鬼捉夫如捉囚
手裂大布蒙夫頭銀鐐鎖禁釘室幽鐵釘挿壁夫難逃
板牀塵膩牛血臊碧燈射隙聞鬼噪當官當夫給錢粟
鬼來捉夫要錢贖朝出擔水三千觔暮縛囚牀一杯粥
夫家無錢來贖夫囚門頓首號妻孥陰風掠衣頭髮亂

飛蟲齧領刀割膚誰來憐爾喉涎枯

郡寓夜坐有述示二僕

瀕死心情愛惜難相依得汝影忘單霜華萎盡秋都老
風角聞時夢易殫天闊但餘新月瘦劒存莫怨舊袍寒
坐閒且共殘尊酒明日江湖事浩漫

出長春門遇故人

各保全家在天心相已多入山須擇木在陸易成河風
擾空汀雁吾慚釣者歌倉皇揮手別前去慎防訛

後冒雨行

九月初七日自郡城至慈北鶴皋作

命微敢畏勞天力苦難借奔雲疲海風但冀一山藉長

霄無斥垠雁死飛乃罷逸馬方逐人何由學閒暇載行
城西塘江颺勁且大髮短不及持笠已逆肩卸江千十
百山潑空助瀾瀉驟瀉難逆收洩出遠林鱗遠林一束
黃勢與上江跨病葉如病民戀枝未肯下我行抵江壩
獨船競危價世亂興僅驕能使達官怕萬幸得渡江解
桎似逢赦守田胡無人亂鳥啄穰秬斯民識生理重命
遂輕稼坐擁千倉庾慮爲殺身貨迢遞及慈城空街一
兵邏巷竈多絕炊解錢市無糲乞芋投廢房爲貸舊烟
銚略嘗聊慰飢兩僕晨已餓斑鳩淒淒鳴瓦脊雀羣和
未防急雨奔泥漿上衿浣兵來告我言月杪郡城破縣

官聞風逃百姓老幼馱冷邑同淨園芻菜遍遭莖幸賴
貳尹賢撫循不移座流亡雖漸還驚弓氣垂痺屋爐一
煨灰牆草並愁塚沍沍雨不休時可日西過急趨西門
行山翠俯相射陟山還望城低霾塞難化下有十萬心
蠕蠕蝨依勝我亦逃勝蝨轉類蟻旋磨前途五十里愈
進愈坎坷欲進情真難不進勢還那健腰力振堪強趾
勇生乍瞬息交長谿峻嶺插嵩華遶瀑天頂來虎門棧
懸架偃側梁挂台呼吸肺崩瀾志殆神耗昏木容易爲
夜避薄緣石脣森森觸刀欄未怨芒履薄洞膚爛成焦
慘聞饒豹啼答我變聲噉誰將恟恍魂招之楚騷些極

目窮四天一黑混楸柘怪籟不中律發盡造物詐疑帥
淮陰軍來辟項王霸衝鏃尋死機吾身咄奚謝下嶺同
墮淵矢疾不留弭順瀉傾怒流詎庸束以填言叩荒店
門聊憩索村醪彈指十日中疊作再生賀斯時雨益驕
燃篝正襟坐壁影搖瘦熊徒供我僕詫透濕寒及腰脛
熱轉如剉挾下東步船呻吟枕包臥浩蕩一寸魂窮洋
片葦簟三更抵鶴麓故人攬衣迓謂葉生雲亭茂才元圭望我心
實焦原無意外訝我身非金剛能受幾摧挫或仍天待
厚砭我百骸情盥濯舒勞筋開筵具羹炙激昂醉後論
一暢灌夫罵窺燈初菊枝吾羞爾嬌妩

九日同葉

元壁元圭

昆季飲作歌

平生自慚酒戶窄，況在危時作筵席。
疎燈一星雨氣夕，花凍衫痕不能碧。
湖風弄幃瑟，以蕭過門黃葉吹涼潮。
蒿蓬天地長錢棄，兵火關河短髮彫。
孤心欲逝難持操，狂歌且作哀猿號。
蛟龍宅徙南流勁，闔闔門鍵北斗高。
石林昆季同鬱陶，起拓銀屏揮寶刀。
神穿鼠穴千靈遁，目攝鴻達萬里逃。
我將往籍羣虎噪，鞭撻屈平焚離騷。
遙憐煮橡供佳節，全命空山漂一毛。
諸君年華各自愛，祥暉待轉扶桑梢。
我還飲酒君弗驚，借醉抒憂誰見撓。
茱萸三枝五枝綠，鈴柝前村後村促。
荒雞粥粥烏續續。

深夜深樽此筵獨安得君爲靄雲吾薰風吾心裔裔君
融融醉鄉日月華胥同結交孟客師陶公皞然大古開
黃農

自姚江至丈亭二章

急掉飛舲奪隘過夾門笳鼓戰江譚山川欲雨秋聲滿
城郭無人暮氣多雁路一繩愁偪側龍堂萬杙怖森羅
護持陌路驚魂定歸歆黃羊祭太阿

黃葉如沙野色昏疑從絕域走崑崙弓刀寞索殘軍渡
雲日東南一氣渾道在未憂天地窄時危始見米薪恩
最輸大隱先生里綠滿桑園有散豚

西壩

津北津南搦巡鼓三兩殘鷗不成伍
鷗背霏霏過山雨
山翠荒寒弄秋燠
水平天曠無客帆
戍旗微赭雲微藍
海東早月橫疎柳
如此關河柳不堪
我舟窄篷如矮檐
斜鉤一尺蘆花簾
拂簾袂影柳同瘦
那有心情歌采蓮
幾聲暗角遠潮送
千里空江獨夢淹
昔年美人賣春酒
青蛤紅鱸賸初韭
市垣蘼蕪黃可憐
乞婦當門坐烹狗
我行迢遞東入河
賸樹明花吹晚波
涼光闊甚知何著
四溟煙聲斷蟀多

十字港

守望肅有備備寇如備夷羣奸方擾東村落自完西積
國爲瞭臺飄飄青竹旗壘石塞汊門擔畚運黃泥千戶
聯一心同困資同依旣免官役艱外事謝聞知鄰村惡
少年斂跡未敢窺夕泊當其孺高枕夢無疑乍有巡柝
聲燈火穿蘆漪天闊木葉彫水雲靜霏霏誰諒遊子勞
近無家可歸眷屬在荒山如鳥借枝栖遙知盼行客時
夢孤鴻飛

西楊

發櫂西楊邨古堡聚成族野芋葉已黃田菁苗方綠暗
水凝凍烟明霜寫初旭簃簃涼泚魚汎汎餓鳥逐遙巒

疑怨秋霽影未肯縛汲女衣雖單猶得住茆屋吾心非
甚愚貧賤苦身跼僥倖逃死亡便求免摧辱造化有缺
端彌縫萬難足當知隨分安自堪養天福節序近小春
元象寓清淑欣然酤濁醪岸然睨黃鵠

黃姑林

既富鹽與魚儲糧復無歎負固堪獨存深地詎資險野
菜不識名萬塍作春染四出烟港多貼蘋膩波簾風吹
烟影微柳枝動疎罔蜻蛉偶來飛水涼氣難曉水東一
角樓平迥遠山澹似有窈窕人梳頭背斜檻舟行故紆
徐與客坐延攬誰念百里中風塵正愁慘擇地思隱居

徒爲望梅噉倘有廬可賃吾來須不寔

踰洪水灣下蘭江

長空秋瘴卷黃茅壑瀉東傾走怒蛟萬壁洩雲風自挽
六天戰電耳先聾大江獨舸憐蓬鬢古吹何年入畫鏡
小泊芙蓉斜日岸去尋鸚鵡碧山巢

抵寓宅

米鹽仗友辦初成乍可投閒養晦冥境匪故安終鑿柄
事如新界闢畦町亂山寄夢秦邊雁異地浮家楚漸萍
且擷芳蘿紉大帶騎羊入峪采仙苓

破樓

破樓無密榻風緊不堪燈濶夢眠依草單衣坐握冰飄
搖危轉劇補葺術何能愧爾靈猿力蒼厓拉瘦藤

卽景五絕句

枯桑瘦老似癯翁紅葉一枝相對紅橫个漁家三尺榜
日高已聽打榔風

高樹晚晴鳴一鳩殘秋氣懦抵初秋最憐幾片斷蕉葉
吹入鄰家織布樓

迎潮送潮一桁山晨來夕去獨飛鵬靜中習得靈機殼
那許吟心靜得閒

不須遠秀擢蒼冥儘縮檐枝當軟屏況有穿籬三兩竹

媚人曉暎作湘青

蓋茅爲屋矮檐遮半揜樵扉未待搗揀得柴堆香麝柏
煮來茗氣似梅花

江水二章

江水日不閒江木日不靜而況窮士懷托憂在人境苦
其所處卑願在勢多梗枉彼天月高來照寤思耿
江水日以逝江木日以彫嗟我窮士心情悅胡由操百
謀鮮一善誰來諒其勞可怜病臂猿匿向西風號

按劍吟六章

一夕何所短百年何所長事業能早成蜉蝣未爲殤按

劒夜坐燈微光北風撼壁天蒼黃明月欲落孤雁翔孤
雁翔北斗轉雁翔不高斗柄短斗柄短翔雁低後宮美
人髮未齊專房寵賜珍珠衣

銀河可使平地流人間乃有蓬萊樓丈夫及時不得用
白日堂堂去如夢騎馬難越河乘舟不上山嵯峨衣冠
竟以狗鼠賤五侯七貴安足多大星炯炯照睂宇手拓
雲帷聽天語天語不聞但聞雨

三閭不雪湘纍冤一飯誰報淮陰恩人生出入有險阻
何啻荒山狎狼虎一斗酒不醉人一寸舌能殺身狂慙
嘯旱天帝嗔巫山綠蘿吹陰雲陰雲不澍萬里渴鬼淚

成河人淚竭祆火空郊焦白骨

烏鴟頭白雞距紅烏鴟稱母雞稱公
蔦蘿寄生借松壽
蔦蘿葉肥松轉瘦人間祕事難盡求
無田可種安須牛
無路可行不須馬萬籟消沈六合瘞
夜半高歌賣漿者
名山不聞有六嶽水黽千年茁青角
蟠桃不熟苦無果
偷向人間食烟火西母被髮同夜叉
豈真嬾鏡剪朝華
金銀宮闕在縹緲有夢當御飛霞車
飛霞之車白虹旆
魂升虛空魄幽墜東方先生真狡獪

聽我按劍吟謂是瑟之大石音曷不和
以清商琴天河
漸西夜將旦烏鴉亂飛獨星爛滔滔
江水流復流一夢

了徹千年愁夜來黑髮晨白頭不如棄劍走帆棹桃花
洞天古潭月肯使仙鬟怨春歇

大帥

軍士當知死大帥當知生恃死聽成敗死亦非完名峨
峨上柱國萬命資爲城中驕守惟愼外憤動皆輕蜀棧
無寸砥秋霜肅難撓事事違太和智者憂先萌聞有回
鵲流沐猴居然纓掣袖肆甘語潛來汨其靈股掌玩閭
權高騎衝轅行羣僚畏如虎側目相戒懲貪狠非善宿
佐之天狗獐木根自戕蠹奚待風來傾一朝大決裂彼
已遁無形而使種種罪悉歸主者承須知隙可緣斯授

黠鼠偵復以慢濟疏所履先失貞竟從悔悟餘勉與忠
義爭殆識天九重皇皇有聖明匹夫徇溝瀆其節亦
錚錚要知輿論公未肯諱生平

客有述三總兵定海殉難事哀之以詩

白日不照魂青天理無改廢士匿隱情何從哭滄海三
公雖武臣嶄嶄國之薦厚祿榮太平夙知眷有在
骨都狼性姦恩命負已每再寇昌國洋捶阨恣鼓賊
維時月塞壯盲風颺以隳黥爾陰雲凝飛火搏懸礪頗
愁城潰崩連檄告所殆入達蛟門轅尙疑詭詞買峻座
擁萬軍張望究何待六日仍絕援孤軍壯亦餒始知移

鎮時已遭圍主紿瀕穹罔恤民霖漲逼昏漸可憐戲下
營十夫九赍赍堅餅和爛泥飲泣忍充餒三公慰撫之
未暇憤與梅相期併力圖一注奪全采誓必殲此酋保
伊民戶救葛天龍武侯虬姿卓英軌抑難去當中權其
氣什佰倍右翼聯曉峰左衝絡青壘青壘誰帥帥式也
太原偉而我滎陽君威稜懍崔嵬滎陽官縉雲擊刺夙
稱美抗旌策諸校膽可蕪韃靡未防賴輜疾背從茅嶺
驪猛發燦炭紅蒼頭盡罹燬絕磴有墮尸流血染枯葦
龍武露青紉四嚮冒弦騖意在陷敵堅力拯未亡士孰
虞部曲軍先已瓦同解趨驤控虎落合刃不移趾批額

驚腦塗子子復何俟惜哉三稜刀僅格叩笮鬼畢命投
土城猶然切其齒俄傳青壘頭骨磔太原死嗟嗟壽春
軍南還無隻履長城一朝壞鹵掠遍鄉里下以戕民命
上以賊國體誰實成禍終誰實構禍始白日懸青天
昭昭有功罪邇聞東岡垠爛沙漉齒髓叢葬歸一邱不
復辨誰氏泐地成沃焦秋霾鬱濯濯作詩聊備風徵信
敢言史且代傳芭篇大招向盤峙

盤峙定海山
名卽盤嶼

金雞山之戰狼山鎮總兵謝公

朝恩

死之

白日鳴鞭走地雷隔江燾偃大行臺出關梟騎追雲遁
入峽龍驤破浪來獵後奔狼驕突砦刼餘封蟻憾焚槐

九原自有全歸樂漫爲將軍致慟哀

鎮海縣丞李公

向陽

殉節詩

臣雖一小吏亦食 天子祿來官 天子地地不能爲
我 皇守臣身亦何有嗚呼公其有守土之責乎公雖
不死誰惟公是辜 或謂公之死乃公之愚而笑公不
讀書惟不讀書而不知大義不讀書而能知大義卓卓
乎公乃異 此爲誰也坐輿皇皇而出南城之坊彼爲
誰也騎馬蹒蹒而馳西門之塘奈何不見我李二公二
公縊於堂 嗚呼二公縊於堂誠二公之愚不爲二公
者當何如 昔誰爲定海死死定海者全典史今誰死

鎮海城死鎮海者李縣丞典史之死吾所知縣丞之死
誰迫之縣丞自死之

暗屋啼怪鴉行爲鄭文學

趙

記其烈婦劉氏事

暗屋啼怪鴉荒門逸獮狗鬼兵渡浹來海城已無守晝
天黃盈盈凋陽不成暉似有五色虹宛委城西闔西闔
茅蓋楮烈婦之所栖烈婦畱金氏嫁爲鄭生妻烈婦有
兩女烈婦有兩兒大兒十許齡少女襁褓持少兒同大
女嬌笑癡能啼鄭生苦傭書烈婦苦織絲傭書復織絲
寒絮飢則糜烈婦不怨貧鄭生不怨賤圭珣埋暗沙精
采有誰見辛年八月杪鼃柱東南傾河水無寸止路泥

無尺平河水多流尸尸流水不潔腥風揚路泥路泥有
人血生曰吾死忠婦曰妾死節死節妾匪難奈兒若女
何大樹遭斧斫安顧牆隅花死忠生匪難奈何以爲家
傾筐不可理攜手愁亂麻烈婦語生前點首淚洒漣婦
還語大兒外家城南偏遠往匿外家鬼將踰鄰牆而孀
有而爺而爺男子強顧孀及弟妹兼難顧兒生鬼去兒
再來再看而孀拂拂掉長尾捨入西家廬西家有婦
姑赤裸遭毒痛仰掌不及梁俯首不得池求死不能死
噤口啞啞呼亦有好男子喁喁同槽豬生云禍將及婦
云咄已急將鴆置酒中缶竿流殷紅殷紅琉璃光大女

汝來嘗飲女遞飲子女殞子同死懷中顧幼女三年未
離乳母死誰乳兒此酒兒飲之少女飲不辭死得孃慰
怡維時萬類盲髡鉗墮元槁斗室萬古天日月雨心皎
對吾何從容正袂敢草草魑魅窺其庭反奔戒滋擾鄭
生有弱弟入門見死嫂可憐死嫂懷猶將死女抱死嫂
死在牀死兄死在地死嫂身已寒死兄死餘氣有氣殆
可活救之獲漸甦救之雖得甦活我誠何辜忍以同命
鳥使其泉下孤屋漏相神明坦誓難模糊莫云鄭生生
鄭生心已死死心從死妻生身怙生子莫云烈婦死烈
婦魂實生夜夜房屋隔靜聞呼兒聲鄭生吾舊友負才

稱不焉貽書告我詳屬我哀以詩烈婦身中材烈婦端
容儀夙見井臼間臬布整裙屐昔爲草霜潔今爲河星
稀河星照獨桑獨桑無蜨枝獨桑如女貞百尺青青枝
下有病馬嘶上有哀雞啼

遣二僕歸詩以送之

共守窮山餓徒供野木嗤論恩吾愧薄聞境爾當知書
劍存長物關河有後期大江殘照下含淚各逶迤

倚江上樓

一鳥下遠天風止翮逾速微命飽有資適機謝羣辱吾
樓無雜林山川照孤竹涼日何沄沄深江晚生縹空舟

橫岸陰童來汎新犢俯弄雲影閒人影自驚綠未識秋
已深猶唱采蘋曲解興不泥時坦懷泯汙俗媿吾廢情
身含生負睎沐古隱難踐希委心向誰屬

有招予赴娥江軍營者謝以詩二章

迂儒生志短謀食尙愁艱手弱難攜鋏江清祇習竿水
雲憐夢弛老病苦親殫勉爾參戎閫勲成錫上冠
有纓原足計世豈乏終軍誤以長風颺來招僻岫雲馬
顛愁試勒弓慄畏膠筋不作庸材棄勞君破格慙

牆角潭訪胡

宋彬

山居

憐君有家不得居奉母挈妻投荒墟可知故人跡弛子

與君茅廬隔三里茅廬竹籬深樹叢野花如豆沿階紅
琴絃鏘鏘吹野風山翠流几窻不空擁書得友似關命
出門無路誰諒窮荒雲陰陰連渤海攜酒看天淚同灑
平生交遊斷消息爾我難誇好顏色種菜不知泥瘠肥
采薪不識樵徑歧西牆日斜黃雞啼木葉落盡愁棉衣
霜林烏巢兩遙望雨虐烟頗有依傍明宵明月能過吾
遲爾菰磯狎寒浪

秋晚村居雜述七章

破勞體矜逸心疾終痼愁水渚芙蓉枝苦爾一生秋一
家五人病欲藥醫難求接續呻吟聲聯牀擁危篝星光

過江大射屋當我眸使我睡想荒靜與諸妄搜散漫有
何涖根始勉持畱窮命感天况順養安其游

夜半喘餓牛撼落西壁泥攜燈飼芻葉鄰婆偶停機鄰
婆年六十短鬢霜淒淒持門無健兒織布自爲衣種秫
自爲飯艱苦防寒飢每言生有常淪汨誰預期風勁能
殺寒大野飄煙稀萬寓浩莽中慚我龜懸絲

村農畏生客久習始漸馴過予論田事詞鄙理多真居
安不識患幸爲荒僻民天或水旱偏有粟儲朽陳遞言
及時變搖首意若瞋謂渠稱官家當繫皇家身食祿
昧其素曷由風兒孫斯言雖慙拙具見直道存

客從危城來示我手中帖駭此仁義名竟與犬豺襲飢
雀貪秕糠鬼奴斯有挾肉瘦不足庖終當受箝夾雲洗
空山清棘滿廣衢狹去就各有懷警諭已無法大鑪方
冶銅未應炭氣乏膏雨行及田吾且習鉏鋤

散步清澗滑薄嵐霏我衣林風送遠歌適逢暮樵歸隔
澗殘葉紅未肯畱斜暉下有殘菊黃知是誰家籬籬根
繫孤憤兩童偶來嬉赤足眠稻牀仰數過鳥飛過鳥夕
始盡兒童夕始歸我懷信何奢泥立偕逶遲

氣與草木親胸懷得秀邃雲動山不搖方知靜者貴野
人慮荒歉有欲卽其累披衣占畢星罔安夜中寐吾慚

稟命艱讀書鮮所遂憐此窮骨存兀兀一峯對朗吟靈
均騷路童拚耳避疑我爲病猿叫雨匿深翠

樓西未沈月隔巷聞早春雜以凋槭聲始知枯林風役
心向勞悴人事難盡窮伏席栖片時貞與天地同雞鳴
萬里白觀始似忘終曳影江杪雲已非前自鴻謀生困
家室有志焉得雄弗云夢境迷醒眼還蒙蒙

暮雲

暮雲心緒遠佳日眼光明弱柳孤宜瘦新棉煖得輕曠
叅羣態變少遣獨居情護惜年華在空山有令名

漸得親朋消息

免得漂零死相逢會有期縱嫌啼笑隔差免夢魂疑有
托窮何拙無歸勢亦歧應知馴虎客近亦逐秋麋

娛鳥篇贈李姬素代古定情篇

娛鳥搗烟結蘿帶一鏡千峯洗昏黛紅綃身世愁玉釵
未肯蟬嫣借鸞態當年嬉春城北樓畫桃旖旎雙瓊鉤
四櫺燭氣憐燒夢半翦鬟雲羞上頭上頭時節年三五
燕子生涯隸歌部照屏灼灼六郎花背笛瀟瀟二孃雨
鳴雛黃毛蘋綠陰芙蓉江天開繡衾魂隨絮輕眞宜水
意到珠擲難語心相依如素無恩怨兩命同巢得天眷
未使桃根送逝潮敢教班女悲團扇杜鵑沿山唱柘枝

紫薺漸褪頰桐肥薄醺枕瑟婢扶去小病淹晨孃喚歸
瀟湘竹波盪晴碧倚桁薰籠炷遙夕細拈雪瓣補罵衣
靜擷風絲縛蟾魄素兒家住文溪城鸚鵡關山署豔名
茂陵司馬三年渴星渚牽牛七夕盟七夕星期喜重遭
病影迎燈各驚瘦誰防癡語引酸啼不耐深涼逼殘漏
十洲綺榭連桷薨闌干上層花下層馬時芳草船時月
百萬纏頭十萬筭軍鞭一聲胡蝶亂鬼騎東來將西窺
喧傳烽火已臨關傾潑葡萄不終譙幾人金屋誇阿嬌
陌路漂零泣軟腰敝衫束鏡依傖卒窄履纏羅走棘蒿
脫襦易餅難求死劓誓憑誰獻公子野塍覓食逢竈姑

秋鬢彫蓬認鄰姊素兒解慧知預防願充箕帚隨匿藏
布荆要踐青山福珠翠甘拋黃竹箱哀角空營大旗赭
落日殘蘼匝城下長笏聶隱射宜鴻細骨翺風馱無馬
靈蛇矮髻蒙絺紗臬襟斜揜胸和花提燈巧賺守闌虎
拔砦潛衝壓陣鴉女牀夜黑仙雲掠一朶芬陀掌心落
敗荷暗澤泣鴛鴦密鏃高林逃鳩雛榮陽潘生方悼亡
忍撫幺絃慰惻傷窈窕乍停水仙襪淒淒恐斷海棠腸
句東曉載鷗夷舸四百山心覓霜笥剔麝評香紙閣清
貼蛩試杼蘆簪妥欲天祕咒懺摩登從此癡猿解縛藤
瓊簫夢裡陽春滿鐵甲人間慘霧凝易安才調香君俠

豈是尋常畫眉妾珍珠一串宋禕匳儷券三生婉姸牒
喬松兔絲相纏綿古歡聊寫定情篇回文織得茱萸錦
護爾蓮房到底圓

夜坐畫梅三章

解得秋柴束都爲骨立形荒山邀滿月皎墨撒明星小
署陽春券相思故屋屏居然成揖讓舊腑拓新町
霜威欺獨燭似仗我吹噓空谷無華胄間心有太初天
當新玉象客擬負春鋤在眼多枯朽精華手自攄

繞屋枿欄樹顛風作夜聲迢迢幽澗夢踽踽美人行箏
笛難搜怨冰霜幾踐盟鍊姿除綺習孤傲軼羣生

鄰人於野田獲馬招予試騎之感得二章

志無一世迴誰親戰骨紛紛感朽陳
秋滿山河延頸嘯意求芻藁
屈身馴縛來如狗村兒侮耕不爲牛
野老嗤八尺井繩籠作轡看吾罄
控狎颺輪

升厓停策動高歌馬亦昂
尻涕淚多亂後田園都失主
棄餘兵甲半沈河人間何處塞翁在
窮壤應無伯樂過愧我牀頭金早乏
相依陌路共蹉跎

遊頭陀巖百寶臺壽峯塔清水菴諸勝自江口山
歸得詩五章

巨松支版閣貯閣但惟碧
碧紫日不到午氣如露夕慘

影動佛容疑醒古僧魄破屋一線泉荒雲裊千尺地深
無世烟鶴巢在天脊隔掌洞府幽待吾寸心闌坐數瑤
華枝玉塵凍吟幘願爲木客傭循苔埽麋跡

萬綠方怨淞山中自微雨出林長髯樵手攜獨僧語破
夢遊始天黃唐轉非古所憂俗未湔就之適遭拒層臺
懸危梯風矯薄衣舉六合秋無歸盡歸此臺貯遠見海
氣黃穢穢動鴻羽頽陽不肯高大地變黃土安得瓠巴
琴蘿陰枕霞撫左攬金母歌右招玉娥舞

天地如我胸芟盡茅蒯亂獨立至坦峯暫爲元象冠峻
塔無傍依束影逼河漢遙對烟外樓是我著書案今朝

策杖憑昨日卷簾看何疑楸枰棋動局有翻換西馳萬
壑忙東逝一川斷誰見雲水交潛有戰魂竄蛟龍方遁
阿巫咸杳難喚禿鶴掠面過陰霾漸瀾漫

泉澀澗語苦風細磬聲瘦花早山已春天近院方晝癯
禪肩骨嶮命以不塵壽笑我食肉形未改獄相陋煮茗
傾石鑪雲絲繚吾袖斟酌猶未多舌本溢嵐秀出門窺
蜺潭側出耀銀寶恐其人間奔倒影堵青岫靈想慚俗
鵲夙夢遂今邁何分以此身而爲此山歎

日暮胡不歸隔簾鳥聲促願乞壞衲衣裹贈片雲綠今
宵海月圓佛界萬花縟留此三尺坪供我夢來宿覓徑

如叩禪多歧更多曲要使一境開故作百迴伏峪南空
江流隨勢讓暑谷遠自天台來到此已微濁微濁猶自
清何敢濯吾足

吳翹見過村居

稻場雀飛耒板靜碌碡當門弄牛影四鄰煮麴烟有香
我憶桃花人日餅人日不日有飛雪松寮坐爐櫓拙熱
吳君偃笠來索醪抽劒鱗羊注生血萬笳聲緊獨歌緩
醉睨江山勢橫絕誰防歡樂同逝駒一換悲涼在胸結
鯢鯨跋沙關峽崩各保親孥與死爭但求食息得明日
那有閒懷及友朋入山以來身坐廢始許翻襟檢情涕

溪鷗柴鹿非我羣，轉似孤生立孤世。暗潮拍耳嵐上衣，
空天未霜颯已淒。每聽深燈脩竹語，頗思佳女青春期。
落葉罷埽聞叩扉，屋角陰苔初得晞。君來攬袂驚我瘦，
安知君面還焦黧。飲君濁酒弗見辭，兵火關河良會稀。
君當朽木我荒草，今後行蹤誰預知。東流潁陽動遠緒，
暮色蒼然合平野。看君擲缶吾噦噫，烏鴉向北鴻向西。
除不相逢無別離。

十月初九夜作

浪卷黃茅過牖，渾轟傳夷虜。逼鄰村，打包人約深巖避。
撫櫝吾慚故劒，存凍陌月斜交犬跡。危樵風緊激鴉魂。

窮洋已乏迴舟路且俟天心靜門門

洞橋天王寺

孤佛對孤樹曲樓當曲阿微風野花落暗院茗煙多習
玩通禪悅遙聲得澗歌一牆山翠遞林勢借嵯峨

響巖

嵐光天景極暄萋探勝何勞短策攜沙渚暗烟聞鷺語
江田斜日看僧犁水聲過峽雲爲愁樵跡當厓樹作梯
賀監高風千古在荒臺釣石有誰躋

冷水菴

塵熱不到門石樓雲氣昏荒松彫佛髻古月鍊冰魂大
復莊詩問

隱宜雌守眞元有上根
癰禪梅托命晞衲向朝暾

巖菴

飢僧出門猿守屋松篁潑空雲氣綠密雲不放磬聲漏
雲外人來但聞瀑瀑光破雲得一徑四山日高徑獨暝
徑苔膩露香過花太古春元此包孕雲根搜盡不見菴
菴在松篁葉底泚松篁埽雲日竟到照見佛衣如紫嵐
上化龍湫

夢從天井過繫得一龍來怒水厓心迸枯雲電眼開似
忘民受福肯使魃爲災誰閔羣生涸爲霖有相才

天台宕

鑿山不枯斲石不死路鋸如刀但苦人趾脈絡破碎元
精獨完靈蛟所宅風雷鬱盤玉樹萬尋明月一握碧海
爲垠青天之角

獨夢

斜月關山迴暮愁誰怜獨夢警殘籌大江水氣涼當枕
禿樹霜枝影在樓底許定心持定籟難將閒跡偶閒鷗
潛陰養晦真潦草慘澹年華惜佩鉤

疊韻寫懷

終朝擁卷苦淹愁起拓蘆簾倚竹簪幾陣亂鴉趨暝色
萬山殘雪擁危樓文章不作翀霄鳳身世真如在水鷗

大冶懸金求朽鐵已無薛燭相吳鉤

再疊前韻示李姬

幽心怕織綠蘿愁但約鄰姑試紡篝脩竹嬈娟消暑雨
初梅綽約眷春樓出山悔濁無根水在浪同爲不繫鷗
好滌元嵒還簡索更刪歌哭謝鈴鉤

懷厲山人

志

山中勞人夢魂拙醉擁江樓一衾鐵柴門盡夜孤柝聲
曉起開窻萬峯雪疎林迢迢羣雀飛空田無食野犬飢
風能作梳客愁鬢雲不爲棉吾怨衣故人老瘦今何依
賤子漂搖絕境栖餘生各抱枯塵面莫乞高天一寸暉

殺身卽世猶恒事
置硯曾無讀書地
文章微賤供豪役
生死荒涼逼窮淚
烟波畫蘋雙白鷗
今年三月南湖樓
飄縷公子尋沽馬
橫槊將軍載豔舟
與君狂歌大白浮
未知衆樂何蹶愁
陽春鶯燕織暄語
聞之但似啼烏秋
今朝浩莽懷吾子
陌路難求真姓氏
乾坤物象方苦寒
我有熱心向誰委
故城沒海魚龍驕
世外梅花香獨飄
蒼翎癯鶴易成素
絕粒容成難見招

九喻九章章二十句

大乙上囚佛乎蟲
螭首鼠執岐莫揮
莫摧焚輪自天其
色渥汭霜然蔽之
所望奚選極心有
涯敢怨陽薄冥龍

夕遷大海其涸嶢哉廓哉萬彙何豪雖有性門不試重
鑰貞哉至哉一元何躍雖有命燈不露微燭

荃蘅不焚春迺加馨有獸者蝻視之媼姪烏乎疑世而
矯其形勺水在坳大潮汙汙孕淑于默觸忤于靈息不
昧昧知能蹈經始妄鮮戒誰相玉成弗伸屈夔將譏負
螭流涕空山白猿爾聽霜斧齒齒不殺冬青

漚肝告神庶諒愚煬埋此太牢以潔其鬱滲風珊珊華
蛻緇翦文芷佩之逍遙者輦晃煜空虛靈轡可攀稽首
暗祈辭不露齟息軫暉恒凝睇微覲流光弗忤貽我洪
恂厥理有萌是用昭闢辟氣四垠以舞長鯨

杼其曠哀先秋而厲治以鼓之商飈吾隸招搖指申萬
豔愁蔽徊隍百年罔剖厥候太古曷師南面軒帝上運
有綱開此盛世胡然眈眈不求汔濟天孫情眠廬帷將
敝孤心罕循六合有際願約刑章拯爾苛弊

山川濺濺方滔其波蛇蛟可醢大張罝羅趨時防忤匪
嬋爲嬰嬋嬰則那往無異科君子曰嘻小人戕戕不爛
是柯當鉏是莎仰首流眄容裔太和培斯正命遑問厥
他上有巫山下有汨瀝吾耳雖蒙猶能辨歌

抱蛻撫卑供朽于蠹美人隰苓惹焉西係恢矣絳霄倚
幹仙嫔宮聲玉篋洩作雷响胡我有心動而抵牾巫咸

不來蹀將奚訴曷箝其跗曷破其瓠曷柔曷督曷禁曷
錮優優挫身吳宰聞額屏墮養韶以法嬰孺

趯趯輪尻何如尺舫佳賓云至兔首用炮春箇翠深吾
肴與捐食實可壽鳳皇不遭嗜斐成癖安觀蕙蕝臚珍
鮮飫憤彼蛟螭流藻春袂技以好要心爲墮華不知所
漂擗日得月避寒就煖伊子雲者曷由解嘲

不求我任甯扞我心我之傷矣誰謂我暗有山曰崑有
水曰澁積癘于瘁匪始自今慰我疇兮爾感之忱俾我
抒兮爾德之情我先我後驕陽駮駮秋陽夢夢獨我照
臨云拊我筑云理我琴憂我君子涕泗其淫

惟鶩斯翔惟龍斯驤厥德孔彰毋俾其忘檢人忤僞亦
有肺腸抱燠而語陰山雪場持我之素捍彼之攘稟骨
硌硌不疑瘠羸有材天眷國是用匡蟻生萬億馴及要
荒我心之懸披可示陽莫我云聽以慚以惶

高尙澤葛氏莊

高陵結宅多暖陽徑苔入冬無寸黃犬窺籬枳訝生客
隔籬警吠園雀翔三兩松枯千百篁吹雲過頂雲忽蒼
雲停在空影在澗澗水清深生荇光主人棉裘青襦襦
爲客埽院開茅堂當階撒穀賺羣鶩擇肥縛宰供客觴
無交彌覺真意厚接古應使勞心忘六天羣物方蟄藏

人間道路多嚴霜流民枕藉飢骨僵空郊新鬼愁無糧
安知世外有大隱太平粒食同羲皇主人既醉客亦將
拂袖不去炊烟香食粟未知種耕事半生慚此筋力强
何時覓得一區地先期儲蓄調歉荒下者植芋高植桑
布衣蔬飯身徜徉招邀彭澤師蒙莊

冬日獨醉書感八章用少陵秋興韻

身世真如鳥托林無端鬱思入沈森浮天海闊黃雲幻
蔽野山荒白日陰好與生靈持旦氣誰忘危難掄宵心
女嬰未摘春衣練莫向牆隅棄敝砧

西國閨婆測景斜未收版籍入中華莎車枉置屯田尉

蔥嶺思窮博望槎苦俟唐軍還劒閣愁聞漢女拍胡笳
何當夢衛汾陽騎獨走天山弄雪花

夸父橫戈怨墮暉南天鷄鳥動希微難持鐵券盟錢俶
悔學金牌召岳飛妄檄煩書同律令但籌下策亦依違
長城散牧多閒馬可惜霜嚴肯不肥

敢道東山少勝棋從亡子弟已堪悲須知毳帳聽絃夕
正值冰天盼續時捫餉疲驢行橐橐過雲哀雁戀遲遲
荒途幾處親朋在不耐孤燈拚淚思

天半金栽萬丈山依然銅柱砥人間如何李牧頻移壘
竟使芝龍再入關誓死久拋韉內刃封侯徒魏鏡中顏

聞渠近習黔鹽術偷服青衣廁卒班

豈真太白識旄頭斬與河山洗閭秋饋臘雞豚空故社
延春花草有新愁高陽不照重泉蟻急雨徒欺過峽鷗
十萬蒼生方待命眼中誰是李崖州

祇求免罪不求功 密詔傳聞錯愕中幸得孤生逢赦
日尙堪萬里破長風籲天算表臣心赤漬野誰憐戰血
紅最苦袖巾捫唾面移槽養獐效癡翁

杜陵窮處苦逶迤且東開懷賦漢陂遠翳定消江北雪
好花待報嶺南枝人天夢覺齊存沒咫尺安危任變移
敢道行吟吾獨醒亂峯相向只低垂

之走馬塘遇故人卽事二章

禿柳誰憐老葉黃
山情人意競蒼茫
喜逢酒旆掀篷笠
擬叩僧寮寄襪裝
風激長林童獵雁
日斜靜市女呼羊
挽衣苦受巡兵詰
踴躍真難效阮狂

出巷驚逢故友臞
相將攜手入茅廬
王孫一飯宜知感
天地窮年尙有途
仗劒出門空涕泗
挑燈警坐類亡遺
枕邊覓得枯毫筆
索寫荒村病隱圖

寒夜吟

索綯搗土乘破樓
夜風揭瓦雨打頭
暗雲束枕嵐氣重
濕霧避燈江影浮
詩硯冰凝墨拒筆
烘爐灰冷茶罄甌

兒童瑟縮不肯睡，隅坐握頤如凍鷗。
老親無眠心計切，視蓄頻籌御冬食。
熟知手窘百艱逼，且作寬詞慰愁色。
一更二更天不晴，埽檐敗穽攪杼聲。
三更未曉鷄鳴，誰來叩門黃犬鳴。
歲華寒近臘八節，況守空山勢懸絕。
山空可惜樹無梅，籟澀遙知海先雪。
海城舊屋無人栖，野菜誰鉏三稜畦。
昨宵夢見屋角樹，瘦鳥背負清霜啼。
清霜淒淒鳥毛稀，似我全家身上衣。
敝裘在典絮禪薄，日望春來洗蕭索。
開窻四顧亂峯巒，下有寒潮送寒柝。
使我孤心沈漠漠。

聞南嶽有梅花覓終日不得

靜樹束澗雲無聲巖氣寂有松花聲飛鷗三兩厲凍色
背動關天初日晶大寒時節重棉輕叉手空山晨獨行
擬裁疎影續姜曲小飄離騷搜屈情太古潛鐫千丈壁
暗斧煙心伐冰棘短禪井女未梳鬟了角半童自橫笛
修篁美人愆遠期裊吾玉想春絲絲疏燈貼幃畫嵐迴
憶昨江樓小醉時醉邊微雨孤衾夢夢見月橫離落枝
離根一溪滑窈眇照我愁魂濯我詩我魂瘦鶴蘿薜衣
飢餐綠雪膚凝脂悄焉留得藐姑盼那肯媚渠胡蝶飛
佳約沈沈阻芳草入世師雄已顏老平生粉黛忍荷袖
此日乾坤感雞曉厓根亂蘚積誰埽石榻仙靈瓊骨槁

幾憑琴淚墮荒苔何處釵痕習么鳥須知品潔殊桃李
要隔凡塵完祕造我尋不得我且歸耿耿元心抱熟灰
明螺細搗一杵墨百尺癰枝筆可揮癰枝百尺神不顛
挂爾蓬壁吾攜杯悲風逼夜萬象慘暄然斗室生祥暉

除夕

去年除夕笳聲裏今夕歲除聞雁聲團坐親拏當酒滿
不知江海正雲橫還春有兆天難祕托足無陂意亦平
東極蒼龍頭角礪江湖萬態約平明